

Službene novine Federacije BiH, broj 106/21

Na osnovu člana 32. stav (7) Zakona o oduzimanju nezakonito stečene imovine krivičnim djelom ("Službene novine Federacije BiH", broj 71/14), na prijedlog federalnog ministra pravde, Vlada Federacije Bosne i Hercegovine na 297. sjednici, održanoj 30.12.2021. godine donosi

PRAVILNIK

O IZMJENI I DOPUNI PRAVILNIKA O POSTUPKU PRODAJE, NAJMA, ČUVANJA I ODRŽAVANJA ODUZETE IMOVINE

Član 1.

U Pravilniku o postupku prodaje, najma, čuvanja i održavanja oduzete imovine ("Službene novine Federacije BiH", broj 5/16) u članu 6. stav (3) mijenja se i glasi:

"(3) Ukoliko je rješenjem Suda privremeno oduzeta nekretnina povjerena Agenciji na upravljanje, direktor Agencije može odlučiti da privremeno oduzeta nekretnina ostane u posjedu vlasnika ili člana njegove porodice, uz obavezu da se o njoj stara sa pažnjom dobrog domaćina. Vlasnik, odnosno korisnik nekretnine snosi režijske troškove, troškove čuvanja i održavanja nekretnine, što se detaljnije reguliše ugovorom."

Iza stava (3) dodaje se novi stav (4) koji glasi:

"(4) Članovi porodice, u smislu ovog pravilnika, jesu: bračni i vanbračni partner, bivši bračni i vanbračni partner, krvni rođak u ravnoj liniji, usvojitelj i posvojenik, rođak u pobočnoj liniji do trećeg stepena zaključno i srodnik po tazbini do drugog stepena zaključno."

Dosadašnji stav (4) postaje stav (5).

Član 2.

Iza člana 12. dodaje se novi član 12a. koji glasi:

"Član 12a.

(1) Do okončanja postupaka propisanih članom 32. Zakona o oduzimanju nezakonito stečene imovine krivičnim djelom, odnosno prodaje, poklona ili uništenja, na trajno oduzetu imovinu primjenjuju se pravila i postupci propisani ovim pravilnikom koji se odnose na upravljanje privremeno oduzetom

imovinom.

(2) Trajno oduzete pokretne i nepokretne stvari Agencija može dati na upravljanje privrednim društvima čiji udjeli su povjereni Agenciji na privremeno upravljanje, a sve u svrhu obavljanja registrovane djelatnosti, odnosno sticanja prihoda ovih privrednih društava i to na period do okončanja postupaka za trajno oduzetu imovinu propisanih članom 32. Zakona o oduzimanju nezakonito stečene imovine krivičnim djelom."

Član 3.

Ovaj pravilnik stupa na snagu narednog dana od dana objavljivanja u "Službenim novinama Federacije BiH".

V. broj 1944/2021
30. decembra 2021. godine
Sarajevo

Premijer
Fadil Novalić, s. r.